

Inatsisartut suleriaasianni § 37, imm. 1 naapertorlugu Naalakkersuisunut apeqquq imaattoq matumuuna saqqummiuppara:

Naalakkersuisunut apeqqutit:

- 1. Naalakkersuisut uppersarsinnaavaat Royal Greenland A/S-ip pisortaanera Toke Binzer DI Fødevarer-ip, Dansk Industri-mut ilaasup, siulersuisuini ilaasortaanersaq? Taamaappat qaqugukkut ilaasortanngornersaq aammalu suliaq taanna Royal Greenland A/S sinnerlugu imaluunniit nammineq inuttut ingerlannerlugu paasissutissiissutigineqassaaq.**
- 2. Royal Greenlandip siulersuisuisa siulersuisuni ilaasortaanera akuersissutigisimavaat, aammalu Naalakkersuisut piginnittutut ilisimatinneqarsimappat? Naalakkersuisut aamma paasissutissiissutigissavaat Royal Greenland A/S-ip suliaq taanna pillugu piffissamik suliffiusumik, angalanernut imaluunniit najugaqarnermut aningaasartuutiniq akiliisarnersaq, honorarimik imaluunniit aningaasatigut iluaqutiniq allanik tunniussisoqartarnersaq, aammalu taakku kimut tunniunneqartarnersut.**
- 3. Naalakkersuisut naatsorsuutigaat siulersuisuni ilaasortaanera Kalaallit Nunaata nunani allani niuerfinnut toqqaannartumik attaveqarneranut, kalaallit aalisartut tunisinermi akigittaanut, Kalaallit Nunaanni tuniniaanermut, avammut niuernermut niuerfinnillu ilisimasaqarnermut piginnaasanik ineriartortitsinermut kiisalu Kalaallit Nunaanni naleqalersitsinermut suliffissanullu qanoq iluaqutaassasoq? Aamma Toke Binzer Royal Greenland A/S sinnerlugu kalaallit inuussutissarsiutinut, aalisarnermut imaluunniit avammut niuernermut kattuffisa sorliit siulersuisuini ilaasortaanersaq paasissutissiissutigineqassaaq.**
- 4. Royal Greenland A/S-ip Kalaallit Nunaanniit pisunik nioqqutissanik tuniniaanerata qanoq annertutigisoq 2023-mi, 2024-mi 2025-milu Kalaallit Nunaanniit Danmarkip avataani pisisartunut toqqaannartumik tunineqarlunilu akiligassiissutigineqartarpa, aammalu qanoq annertutigisoq Danmarkimi ingerlatseqatigiiffiit, allaffiit imaluunniit akunnermiliuttut allat aqqutigalugit tunineqarlunilu akiligassiissutigineqartarpa? Aamma nioqqutissat qanoq annertutigisut Danmarkimi suliarineqaqqittarnersut, poortorneqaqqittarnersut imaluunniit tunineqaqqittarnersut paasissutissiissutigineqassaaq. Kisitsisit sapinngisamik annertussusinngorlugit nalinginullu koruuninngorlugit saqqummiunneqassapput.**
- 5. Naalakkersuisut aalajangersimasumik anguniagaqarpat Royal Greenland A/S-ip nunani tamalaani tuniniaanerata, akiligassiisarnernata, niuerfinnut nittarsaassinerata naleqalersitsineratalu annertunerusumik siunissami Kalaallit**

Nunaanniit Danmarkimi akunnermiliuttut aqutiginagit ingerlanneqalernissaa? Taamaappat anguniagaq, piffissaliussaq Kalaallit Nunaannullu aningaasatigut iluaqutissat naatsorsuutigineqartut paasissutissiissutigineqassapput.

6. Royal Greenlandip siulersuisuisa imaluunniit Naalakkersuisut nalilersimavaat Royal Greenland A/S-ip Kalaallit Nunaannut naleqalersitsinissamik pisussaaffiata aammalu DI Fødevarer-ip qallunaat inuussutissalerinermut suliffeqarfiutaasa inuussutissarsiornikkut sulisitsisullu soqutigisaannik sulinerata akornanni soqutigisanik akerleriittoqalersinnaanersoq? Naliliineq aammalu attuumassuteqannginnissamut, paasissutissanut isertuussanut, unammilleqatigiinnermut kiisalu naleqalersitsinerup Kalaallit Nunaanni inissisimatinneqarnissaanut tunngatillugu iliuuserineqartut nassuiarneqassapput.
7. Naalakkersuisut Namminersorlutik Oqartussat tamakkiisumik ilaannakortumilluunniit pigisaanni ingerlatseqatigiiffiit direktioniini aammalu qullersatut aqutsisoqatigiinni ilaasortat avataani siulersuisuni ilaasortaanerat, siunnersortitut sulinerat, suliffeqarfinni allani atorfeqarnerat kiisalu suliat allat akissarsiaqarfiusut akissarsiaqarfiunngitsulluunniit pillugit ataatsimut takussutissiissuteqarsinnaappat? Aamma piginnittuunerit annertuut, maleruagassat atuuttut naapertorlugit ingerlatseqatigiiffiup siulersuisuinut imaluunniit piginnittumut nalunaarutigineqarsimasut aammalu soqutigisanik akerleriittoqarsinnaaneranik pilersitsisinnaasut, ilanngunneqassapput. Takussutissiami ingerlatseqatigiiffik aqutsisullu suliaassaa, avataani kattuffik imaluunniit suliffeqarfik, suliaq nammineq inuttut imaluunniit ingerlatseqatigiiffik sinnerlugu ingerlanneqarneraq, kina akuersissuteqarsimanersoq, honorari kina pissarsiarineraa aammalu soqutigisanik akerleriittoqarsinnaaneranik naliliisoqarsimanersoq ilanngunneqassapput.
8. Namminersorlutik Oqartussat ingerlatseqatigiiffiutaasa aqutsisuisa avataani suliassaasa aammalu aningaasatigut soqutigisaasa annertuut nalunaarutigineqarnissaannut akuersissutigineqarnissaannullu ataatsimoortumik maleruagassat suut atuuppat, aammalu Naalakkersuisut suliat taamaattut pillugit tamanut saqqummiunneqarsinnaasumik minnerpaamik ukiumut ataasiarluni nutarterneqartartumik takussutissiamik pilersitsiniarpat? Taamaangippat tamanna tunngavilersorneqassaaq.

(Inatsisartunut ilaasortaq Pele Broberg, Naleraq)

Tunngavilersuut:

DI Fødevarer-ip nittartagaani pisortatigoortumik Royal Greenland A/S-ip pisortaanera Toke Binzer kattuffiup siulersuisuini ilaasortatut allassimavoq, Royal Greenland A/S-ilu suliffeqarfittut taaneqarpoq.

DI Fødevarer Dansk Industri-mut ilaavoq. Kattuffik nammineq paasissutissiivoq ilaasortami suliffeqarfiutaasa soqutigisaannik sullissilluni Danmark inuussutissalerinermut suliffeqarfimmik ingerlatsiffissatut pitsaanerpaaffinngortinniarlugu sulissalluni. Royal Greenland A/S-ili Kalaallit Nunaanni Namminersorlutik Oqartussanit 100 procentimik pigineqarpoq, pingaarnertullu Kalaallit Nunaannut, kalaallit aalisartuinut inuiaqatigiinnullu kalaallinut naleqalersitsisussaavoq.

Naleraq aalisarnermut inatsisip 10. maaji 2024-mi aappassaaneerneqarnerani erseqqissarpaa kalaallit aalisagaasa aalisakkanillu nioqqutissiaasa Danmark aqqutiginaq nunanut allanut kiffaanngissuseqarluni niuerutigineqarsinnaanngippata Kalaallit Nunaat Danmarkimut pituttorsimanerulissasoq. Naleraq aamma nunarsuarmi niuerfinni akit aammalu aalisartunut pitsaanerusumik tunisinermi akigitat pisariaqarnerat erseqqissarpaa.

Kalaallit Nunaanni Namminersorlutik Oqartussat ingerlatseqatigiiffiutaasa annersaanni pisortaaneq qallunaat soqutigisaqatigiiffiata siulersuisuinut ilaasortanngoraangat, Naalakkersuisut nassuiartariaqarpaat Royal Greenlandip periusia nunarsuarmi niuerfinnut Kalaallit Nunaanniit toqqaannartumik attaveqarnissamik ineriartortitsinersoq, imaluunniit niuernerup, akiligassisarnerup, siunnersorneqarnerup naleqalersitsinerullu annertunersaa suli Danmark aqqutigalugu ingerlanneqassanersoq.

Suliap aamma Namminersorlutik Oqartussat ingerlatseqatigiiffiutaanni tamanut ammasumik ingerlatsineq pillugu ataatsimut apeqqu pilersippaa. Naalakkersuisut piginnittutut aqutsisut avataani suliassaannik ataatsimut takussutissaqartariaqarput, aammalu suliak akuersissutigineqarsimanerat soqutigisanillu akkerliittoqarsinnaanerata nalilersorneqarsimanera maleruagassat ataasiusut naapertorlugit uppersarsinnaasariaqarlugu.

Apeqqutigineqartut ullut suliffiusut qulit (10) iluanni allakkatigut akineqareersimanissaat piumasarineqarpoq. Oqaatsinik nutserisimanermi paatsuungasoqassatillugu kalaallisut allassimasoq aallaavigineqassaaq.